

武
夷
山
志

武夷山志卷之十八

武夷董天工典齋編集男勅校刊

方外

仙

陶唐

彭祖姓錢名鏗相傳古陸終氏第三子也亦謂之中黃君
傳稱其嘗進雉羹於堯堯封之彭城故稱彭祖又有曰
商賢大夫卽所謂老彭隱居是山善養生術壽七百七
十七歲子二曰武曰夷同居于此或曰山因是得名

彭祖之事幻妄不經靈均天問所云彭鏗斟雉帝何
餐壽命永多夫何長正以其事爲不足憑後世尙奇

反撫拾而爲列仙傳謬矣其傳中六十七妻等事尤不雅馴○論語疏證在商爲守藏吏在周爲柱下史

秦

皇太姥相傳爲神星之精母子二人來居武夷採黃精以餌能呼風檄雨乘雲而行秦人呼爲聖母衆仙稱爲皇太姥今稱太元夫人

武夷君相傳昔有神仙降山中自稱武夷君受上帝命統錄羣仙授館於此漢武帝時遣使祀之宋紹聖二年禱雨獲應現相雲中封顯道真人元符元年進封真君端平元年加封顯道普利嘉熙元年又加冲元字云

劉少公舊稱武夷山主雲笈七籤云武夷爲昇真立化洞

天真人劉少公治之

控鶴仙人名屬仁乃天台元虛老君華真僊師第七子也
嘗駕鶴至武夷時魏王子騫與張湛等禱雨龍潭而僊
人適至騫等具懇遂獲甘霖湛因獻詩曰武夷山上武
夷君白馬垂鞭人紫雲空裏只聞三奠酒龍潭波上雨
紛紛屬仁見子騫等丰骨異常訪道精確乃遣何鳳兒
往天台取仙籍檢視具載子騫與湛等先以飲酒過度
忤黃元真人謫居此山八百年後仍得甌骨仙化因授
以九品丹書

國朝董天工查本朝王志削去湛獻詩謂據蕭子開
建安誌載云湛獻詩乃沈韻唐體截句又謂詳玩詩

語當是宋紹聖間禱雨於武夷君道流迎神送神之
曲誤爲湛猷詩予編山志亦從王志剛削忽一夜夢
在琢玉齋頭見一仙騎鶴懸空而至黃髮束髻面長
棗色雨夾輔有卷鬚全身鶴羽問予曰聞子在此修
山志湛猷與我詩載否予應曰載矣仙曰此乃真詩也
前志俱載後志謂悞削去錯矣今載便是但聞鶴翎
浙浙從空而去
今從前志載入

十三仙魏王子騫張湛孫綽趙元奇彭令昭劉景願思遠
白石生馬鳴生胡氏李氏魚道超魚道遠子騫或曰魏
國王子或曰魏時人姓王名子騫或曰不知何許人或
曰延津人皆不可考山南十里有魏王故城相傳爲子
騫所築中有王城廟湛等十二人亦不知何許人白石
生或稱白玉生或稱白石先生或止稱白石馬鳴生又

稱馬鳴先生俱未知孰是胡李及二魚皆女真稱爲毛
女子騫學仙於武夷居大王峯下十二人亦以修煉來
山中依子騫爲地主後皆仙去子騫蛻骨在小藏峯其
頭顱尙在仙館巖罅中紹興十八年封子騫冲妙真人
端平元年加封冲妙孚惠又封湛以下俱真人嘉熙二
年進九真人俱真人四女真人俱元君封號詳見諸命
潘遇崇安人先世居中奢地名在山南因魏王子騫給奉張湛
等十二人移居武夷山中亦仙去稱爲從神端平元年
封通靈協濟侯嘉熙二年又增協濟妙感侯

漢

張垓後漢時候官人或曰晉人初至武夷隱姓名有自草石中拾一古木牌題姓名其上一日登大王峯石巖中坐化遺蛻至今在焉其首右顧相傳將解時其母追至呼之是以顧視巖下云背有白點如錢者六七手有杰字坐旁方石樵者嘗見其上一金蟾蜍昂首向蛻因號爲張金蟾萬曆初直指楊四知見其裸程近襄塑而飾之仍護以鐵欄云今像在欄廢

張金蟾諸志皆各垓聞大記作張漢或因漢與湛音悞但湛在十三仙中爲秦時人垓爲後漢人時代甚明何容疑誤

晉唐

婁師鍾晉時人 薛邴唐時人 李鐵笛洛陽人 李磨

鏡燕山人此四仙者或傳其時或傳其地事實俱無可

考二李並名字失之又八曲鼓子洞有 張草衣亦無

名代白玉蟾記謂俱於止止庵仙去

孔莊葉三女仙俱會稽人唐天寶間來武夷學道棲天柱

峯下一日遇皇太姥授以丹訣指往東南覓修煉之所

乃於均峯得雲虛洞居焉道成投身換骨巖仙去

詳見雜錄

許碯唐時高陽人自稱高陽酒徒少舉進士不第學仙於

王屋山遍遊名山嘗至武夷絕頂題云許碯自義山尋

偃月子到此又題詩云閬苑花前是醉鄉踰翻王母九

霞觴羣仙拍手嫌輕薄謫向人間作酒狂或詰之曰我
爲就宴崑崙失儀見謫衆目爲顛後忽乘雲去

南唐

李良佐字元輔南唐元宗璟之弟也性冲淡保大八年辭
璟訪道入武夷遂居焉舊觀在洲渚間璟勅有司移於
今址賜額會仙冊封演道冲和先生又鑄鍾重千餘觔
自金陵航海至閩良佐居武夷三十七載坐化於觀之
清虛堂其弟元真造至藏蛻於觀後今武夷祀之以爲
開山之祖

按大鐘懸漢祀亭側順治初年建陽羣盜至疑其金
也碎之乃倭銅甚可惜耳
清志以良佐載諸羽流

邱永錫崇安縣志
日之爲仙今從之

宋

鄒錄事失其名趙清獻公宰邑時應役爲錄事奉公甚謹
一介不取公秩滿貧不能歸鄒鬻田得錢百緡以助行
公不受鄒曰業已鬻失祖父田錢無所置公詢之果然
乃受之鄒自是棄妻子入武夷後得道尸解於幔亭

吳懷玉崇安新豐人居武夷老無衰顏行坐閉目人問之
曰俗無可觀因號眇翁年九十六無疾而逝

詳見
雜錄

葛真人 詹真人各代皆不詳僅見於白玉蟾雲窩記所
謂靈巖之葛鼓樓巖之詹是也二曲靈巖石穴相傳昔

有巨蟒吐氣傷人葛除之卽其地創庵以居至今有葛
仙館馘妖洞之稱詹亦魯驅踞洞之蟒亦卽其地創庵
居之但蹟在九曲雲巖洞庵曰雲巖庵與白記所云鼓
樓巖者有異是一是二莫可考矣

李仙 羅仙俱無名代事蹟惟四曲鳴鶴峯之西南一高
峯上有石洞陡險稱李仙巖相傳爲李仙坐蛻處武進
白愈事悅題詩甚稱之或亦別有考據耶羅仙人者前
志以爲廬山人得寶印立文於一曲之換骨巖仙去
吳公 邱公名代亦失傳吳在八曲鼓子峯右石室中修
煉一日將炭畫皆綴于石壁隨畫隨登遂冲舉今稱石

壁爲吳公洞邱在九曲靈峯左石室修煉一日坐化留
詩日本是瀛洲仙子徜徉玄化洞天笑指蓬萊歸去沖
飛直入蒼煙今各其洞爲邱公洞

知微子樵陽人或曰姓孫失其名字嘗採藥武夷結茅於
一曲之毛竹洞餌松飲水得沖舉術有知微子一卷行
世蘓文忠爲之叙

徐熙春邵武人宋熙寧時業市酒有韋道人者乞酒於其
婢輒與之熙春覺撻婢傷膚道人與以百傷丸立瘥且
教以製法傾餘水於井令再造必取此水丸治百病今
遺方尙存有驗熙春嘗憂鐵冠道人揖之語旦至城南

五峯院得之如所憂者自言姓蔡任武夷遺熙春五花草食之由是絕粒蔡約以某日會武夷如期而往蔡已先在熙春以水深不能渡止金身院修煉後坐化于大王峯東壁今遺蛻猶存其容欣然如含笑云

陳冲素號虛白時地皆不可考修道武夷著規中指南盡發內丹三要之旨嘗與樵者飲忽仆地夢入一洞食青靈芝卽絕粒後仙去

李陶真東京人熙寧末至武夷居一曲止止庵出牒示人乃唐開元時所給衆皆笑之好吹鐵笛每作穿雲裂石之音值臘節道士各招飲李俱赴之諸房笛聲一時同

發衆駭之後又居建平里之通仙巖一日留詩別衆云
毛竹森森自剪裁試吹一曲下瑤臺當途不遇知音者
拂袖白雲歸去來衆聞笛聲隱隱漸遠不知所適

王文欽不知何處人舊志載八曲石鼓道院爲唐侍宸王
文欽修煉之所考閩之省郡邑志均失載惟隨遇堂集
中有傳謂江閩之間稱王侍宸者乃南豐羽士宋時賜
號之仙人王文卿也閩大記稱文卿宜和間來建寧又
名顯道人一日風雲晦冥登樓視之不見其處以二說
忝之當卽其人或傳聞異詞訛卿爲欽訛宋爲唐耳

黃樸樵川人紹興初訪道武夷遇仙授能絕粒後坐化於

三仰峯

詳見
雜錄

白玉蟾字如晦號瓊琯又號雲外子本姓葛名長庚祖有
興闢清人司訓瓊州紹興初玉蟾生於瓊父歿隨母適
白氏因冒其姓幼敏慧十歲應神童科主司命賦織機
詩即應聲曰大地山河作織機百花如錦柳如絲虛空
白處做一匹日月雙梭天外飛其後屢試不第拂袖入
羅浮得洞立雷法能呼召雷雨生平文思汪洋噴刺數
千言善詩其草書有龍翔鳳翥之勢後遍遊名山後至
武夷曾講法於冲佑之采隱堂居止止庵有自讚云千
古蓬頭赤腳一生服氣餐霞咲指武夷山下白雲深處

吾家嘉定間召對稱旨館太乙宮一日不知所往詔封
紫清明道真人有瓊琯集行世彭鶴林云玉蟾嘗夜過
鄱湖剪紙爲月噓於檣端照行達旦又與衆泛西湖酒
酣躍入水尋於海豐見之

郭道人隱其名自稱卧雲子能預知人禍福紹興間至湖
州遇 諸葛行正言其生平如目覩行正遂師事之偶
入市有人指之曰此人吾見其死於京師何以在是郭
語行正人既識我不可久居乃同行至壽春不辭而去
越三年復至行正事之如初因有密授俱入武夷乾道
中同日坐化行正號洞陽子

徐頃崇安石雄里黃連坑人嘗於三髻山

崇安別山非遇
本山三髻峯

仙對奕啖其餘粟歸卽辟穀乾道間歲早邑令諸葛廷
瑞召之所雨頃登永隆寺鐘樓望三髻招呼之朶雲西
來須臾大雨後生化鄉人祀之名其庵曰望仙復有人
於昇真洞見之

黃咸中東陽人曾宿止止庵遇異人授以仙術

詳見
雜錄遂康

家通遊訪道後任洞空山二十年號洞空子歸武夷年
九十生化

(元)

金志陽號野庵永嘉人素不櫛髮人呼爲金蓬頭結庵於

龍虎聖井山病者求藥卽餌以所供菓餅無不立愈嘗
因早登井召龍出龍漸小躍入袖中乃警以偈縱之卽
雨後至武夷居一曲之復古洞及止止庵不爐不扇至
元間坐化旬餘體顏不壞

(明)

蔡雙髻不知其名自云河南人少業儒中歲棄家入終南
山後至鵞湖時費文憲公家居知其異人留數載既而
棲武夷山北之水簾洞五六年或數日不食人與語多
不答一日失其所在或見之終南云

王廣崇安人幼嘗墮水忽一僧挾之出嘉靖中學道武夷

水簾洞勵志勤苦遇異人指授每行人遠望之有兩身
焉自刻時日沐浴別衆端坐而逝翼日鼓子峯道人見
廣來索所借木魚持還之不知其已解也今遺蛻見存
洞中

草鞋仙萬曆時人居武夷杜葛巖日織草鞋以市後經年
不見或詣其室屍已枯矣乃議瘞之憐其裸爲製衣服
將殮肢體柔和竟可扶坐衆咸驚異因卽巖鑿石爲龕
厝焉康熙間王適菴至梧峯僧衍操爲道其事同往觀
之衣朽無存而皮肉未毀首微俛瞑目跏坐鬚髮宛然
計之蓋已百年矣龕之額鐫歛西程艮初五字

佛

唐

扣冰古佛姓翁號藻光崇安吳屯里人先世居長安父承
贊字文堯唐乾寧三年進士拜右拾遺天祐初以冊封
王審知至閩中原多故遂卜居於崇有詩名多著述嘗
夢老比丘荷錫求宿有侍者曰此辟支佛也既而母孟
氏生藻光異香滿室十歲欲出家父母念夙夢聽之杖
錫雲遊往叅雪峯禪師初至庭雪峯探其造悟曰進則
死退則下答曰橫行數步又何妨比辭歸雪峯送之曰
子異日必爲王者師又歷遊四方一日忽悟曰欲會千

江明月止在一輪光處何勞破此芒鞋耶遂求靜僻掃
跡塵魔以成定慧每日問主人翁曰惺惺否隨自應之
曰惺朱子嘗引此以明誠意之旨冬月扣冰而浴故號
扣冰曾棲止武夷之桃源洞後結庵將軍巖二虎常侍
側緇流爭飯之有問之者曰何不誦經曰心心常念何
不禮佛曰念念常敬何不升座曰空空無說又嘗曰心
炎火撲滅扇不動死灰雖非上乘其辟支之力如此閩
王延鈞聘至福州郊迎隆禮因誡曰願王以百姓爲念
勿多殺延鈞送居鼓山翼日說法留偈而化今縣北吳
屯之瑞巖寺乃古道場當其別鼓山時有誓願百里永

無大災之語厥後弭寇禦災果著靈響其生以會昌甲子二月初八日至今屆期迎奉萬衆炳燭宋時嘗累封靈感法威慈濟普照大師平生行實則有呂丞相贊翁考功記趙清獻劉少傅劉文靖朱文公游莊簡諸公詩其護法神日顯仁靈佑侯協仁孚佑侯輔仁廣佑侯土人稱唐葛周三將軍

羽流

宋

王通永平人學道武夷毛竹洞能飛神御氣呼召雷雨朱
治平三年辭衆往黃柏山坐化詔封洞明普靜真人
江成直號心隱南宋時建陽人少入武夷從張巖隱遊清
修甚謹以祈雨聞於朝授道判晚築室水簾洞修丹坐
化

江師隆號三白建陽人本儒家子風儀秀拔以父命修道
武夷得異術能致雷雨紹定中錢塘有水孽詔赴闕以
法平之賜號金門羽客乞歸武夷眷賚優渥御書常庵

二字賜之庵在一曲兜鑿峯麓仍奉旨督臨安諸祠觀
嘗大修冲佑觀又請加武夷十三真君及同亭潘侯封
號浦城徐文靜忠簡兄弟甚敬禮之後坐化於常庵中
林壑堂

劉夢鼎號竹所崇安人忠顯公曾孫也母夢羽衣客捧鼎
來寄因有孕及暮乃誕遂以命名少聰明博學長而好
清微道法行靈寶醮事多驗曾建錄齋於邵武九龍觀
枯井湧泉天降甘露一日在南浦遇一道士稱為武夷
侍者迂公回山倏不見歸家沐浴更衣坐化

陳丹樞不知何許人辟穀不粒終日凝神不語興寢談笑

與常人異年至八旬其顏如童附身僅一破衲結廬于接笋峯下曰雲窩白玉蟾爲記稱爲先生山人言其所居石曰石竈至今猶存

陳洪範字天錫號浩齋喜種橘所居題曰橘隱白玉蟾爲記稱其丰神骨範云

劉妙清女道士東陽人入武夷山修道恬澹清苦遺世出世師事陳丹樞附其廬結數椽以居取何仙姑幽居山林間荆棘隱此身之句題曰棘隱庵白玉蟾作記廣引古今列女登仙者況之

元

王與敬號秋崖三山人居武夷山嘗遊雲州求雨大應城中有妖治之頓滅當事薦於朝授號至道立應通妙法師至大間乞還山有句云依然拂袖歸山去止止庵前伴白雲

彭日隆號隱空崇安人初爲萬年宮新戒遇異人傳授雷法禱雨極驗叔和陽道院於九曲虞文靖公集爲之記初未嘗學問讀清淨經有悟信口吟咏頗有理致嘗自讚云五五二十五只管從頭數到底一也無松梢月當午卒時正七十五歲

張與玉號霜崖三山人博雅善詩遇異人得秘術禱求立

應居武夷羽流多從學閩憲薦授法師無疾而化

張克真號平心三山人居于武夷崇安光化寺有狐爲祟
召雷斅之福寧州旱投符龍湫遂雨州人羣送過飛鸞
渡遇風舟皆覆惟克真所乘無恙乃誦呪書空作符溺
者胥浮出無損張天師薦於朝及命下已羽化矣時年
七十

張志道號原中崇安人居武夷深究玄理博綜三式之書
或薦於朝以疾辭

林文能號存心三山人博覽羣書頓悟玄妙嘗獲銅符治
病立驗善能經鳥伸之術不畏寒暑居大王峯頂辭召

不赴賜號講師泰定間無疾而化年九十五天鑑池側
所遺石曰乃其結廬處也程斯道師事之居止止庵
元末詔至京賜號通玄子

余復嬰元末羽士也居復古洞能詩與藍山兄弟倡和

明

汪三寶字麗陽號痴願鉛山人一云貴溪劉端陽號古松建昌

人同學玄風以詩文書畫相友善嘉靖間至武夷創玄
元道院於接笋峯頂閉戶清修灑然出塵人稱汪劉二
高士汪有集曰野懷散藁徐興公亟稱之

張廷安崇安人嘉靖間遊京師祈雨有驗詔封贊教真人

復歸武夷坐化

張三丰俗呼張邈邈嘗遊武夷飲通仙井水曰不徒茶美亦此水之力也

周千秋字喬卿號一丘莆田人文雅能詩與謝在杭方伯友善晚歲日暮入武夷築室於山北之碌金巖靜攝數載復明七十餘披閱不倦燈下猶能小楷後其子迎歸養踰數年無疾而化其徒何一鶚字翔宇亦能詩

黃合賢號知白大梁人少好道入三茅山有閭希言者三百餘歲矣合賢師事之獲秘授逾七旬顏如童子晚叔知白庵於七曲三隱臺萬曆初有懿旨擇高道檢道藏

金舉合賢應召旋受寵褒後無疾而化

江一源嘉靖間居止止菴能詩與傅汝舟嘗倡和

國朝

鍾全容號大拙房縣人左目重瞳棲大王峯頂二十餘年
于康熙初年坐化

任圓智號若愚鉛山人事母孝母歿居鶴巖精于數學嘗
往建寧問易于任上昇辭歸昇送之曰不意吾儒之易
今爲道人得去抵山三日坐化年五十九塋于堯塋峯
下

金象字乾陽號鶴奴新安人初入三茅修道繼居羅浮二

十餘年後至武夷結廬大隱屏之巔題曰隱屏仙居年逾七十陟降險徑如坦途狷潔冲靜能詩善書畫或謂早爲諸生棄而入道者也康熙初年生化

鄧行達江西人居止止菴二十餘年日事種植以供大衆自甘淡泊卽賣菜得錢亦歸常住卒前數日衣冠辭別各菴至明趺坐而化

潘養素福州人康熙甲子乙丑間坐化於一曲之紫雲洞又建昌劉教龍字虛中以名家子有託而逃立踵事紫雲閉關幾二十載至庚寅亦無疾而逝

虞啟祚字湛錫崇安人與藍文秀重爲募建冲佑觀法堂

及東西兩廊各十八間能繼先志建寧太守張公琦以
函闕紫氣額旌之

釋子

(明)

慧明族里無考天啟初從南海來結茅於火焰峯頂不下山者四十餘年趺坐而化

元鏡字晦臺號湛靈建陽洪氏子嗣法壽昌曾住武夷虎嘯巖晚又於一曲石瓶巖結茅以居一日指巖下謂徒曰此處可埋我遂瞑江右詞部黃公端伯撰塔銘有語錄詩集世稱東苑鏡禪師

道盛字覺浪別號夢筆杖人浦城張氏子幼業儒從元鏡出家一日聞猫子墜地聲豁然有省遂閉目夢筆山又

從壽昌博山盡得曹洞宗旨歸侍東苑歿始出坐道場
五十餘處開法南都宗風大振其及門皆遯跡巨公相
城方太史以智江寧倪民部嘉慶其最著也初道盛從
師住武夷數年拜經於二曲虎嘯洞勒字於土地嶺之
石壁曰西來巖時崇正庚午歲也

（國朝）

海靖延平人善詩及畫有武夷圖志嘗同天使往琉球國
圖其山川以歸卽胡獻卿也後爲僧

克信號節菴蘓州人善山水及詩寓天遊象峯數年

大寧字石潮道盛弟子博洽能文嘗止錫武夷後主金陵

天界方丈著有詩文集

如疾字疵已龍溪人菴居內金井能詩善書嘗作武夷導
遊記文詞典贍

超位號壽宗漳浦盧氏子黃石齋門人好學善詩文初居
武夷以母老晝夜念不釋尋歸省依依膝下數年顧不
能忘情是山乃奉母至擇山北之章堂結茅以歸母壽
終塋曼陀巖廬墓三年遷歸漳浦合窆已還武夷選勝
築室于筇巖曰莫庵傍有清泉湧出居恒靜坐言笑不
苟而遇衆溫寬人多販之其徒明開字鐵華亦漳人能
傳其衣鉢雲遊京師

誠親王賜以洞天花雨額恭懸庵內陳太史夢雷有送開

明歸山序

道桓字竺民號凡木龍溪楊氏子八九歲喜讀古詩歌及
長披緇居小九曲之泊庵卽事長吟遊者多稱之其徒
明智字非固亦龍溪人好爲詩有踵事其師之意

衍操字松山漳浦劉氏子先世仕學相承有三劉之目衍
操足跡遍四方歷有聲名晚得武夷山北之梧桐窠結
茅居焉手不釋卷宛然儒者著語錄八卷詩集十餘卷
性坦號樸堯漳州諸生原名蔡仲修黃石齋門人能詩文
居御茶園三載歸省祖塋卒年八十餘

淨青字千松泉州人能詩及尺牘居復古菴二十餘載足跡不至城市近今罕及年六十有三卒

超全號夢庵同安人俗姓阮名旻錫字疇生魯文忠公樓門人乘諸生自稱輪山遺衲有海上見聞錄二卷慢亭遊詩文一卷

真熾字洞照號晦崖晉江人梧峯衍操弟子也

宗楷字雪芝別號鐵社善畫蘭又工書法與李懷之藍素先顧子燦號夷山四名士

超煌又名元煌字泉殷龍溪人俗姓陳居虎嘯善詩畫嘗主浙江天童法席

武夷山志卷之十八終

武夷山志卷之十九

武夷董天工典齋編集男勅校刊

古蹟

虹橋板

大王峯昇竝洞外有木板縱橫插於巖際相傳武夷君設宴幔亭時架虹橋以引鄉人及下橋遂斷其板飛插各峯石罅迄今大小藏峯鼓子峯金鷄洞諸處皆有之風雨飄搖歲久不腐人亦莫能取間有自墜者色黝而澤類沉香文理堅栗不辨何木土人珍之云能除胃氣痛辟火災祛邪祟焉

望虹橋板

明 吳道新

度閣連鰲駕海山，津梁特爲度鄉閭。
扶桑木自曦輪歛，叢桂枝經月斧刪。
朱楠丹楹由太古，綃宮貝闕在人間。
分明鸞鶴還來往，斷靄殘虹不可攀。

虹橋板

徐 勣

虹橋當日晏曾孫，千載還餘片板存。
堅比挿空孤嶂迥，香同委地落花魂。
輪囷莫是靈椿幹，枯槁疑爲若木根。
細認群仙行步處，依稀猶見草鞋痕。

虹橋板

吳應聘

丹鼎騰空木亦仙，斷橋飛上共雲懸。
不堪虹氣藏幽壑，夜

夜峯頭吐紫煙

虹橋板

韓奕

仙洞遺蹤不記秋懸崖千尺浸溪流飛橋幻術渾多事斷
板忝差空自留

集詩經題虹橋板

李卷

天作高山克峻克嶷洵美且武云胡不夷惟石嘒嘒倬彼
雲漢豈伊異人誕先登于岸爛其盈門肆筵設席如川之
方至爲賓爲客曾孫之慶小大稽首不吳不敖在帝左右
鼓瑟吹笙樂且有儀旣醉而出廢徹不遑風雨如晦胡逝
我梁顛之倒之于彼高岡其比如櫛視爾夢夢於萬斯年

不震不動其爲飄風或降于阿率彼幽草云如之何采薇
采薇邂逅相遇爰笑爰語厥聲載路我其收之如取如携
必恭敬止如璋如圭惠于朋友旣堅旣好罄無不宜以作
爾寶譬彼壞木金玉其相如切如磋牀有烈光富難何期
相在爾室用戒不虞有如皎日我之懷矣其在于今辭之
輯矣以矢其音

虹橋板歌

板爲崇安潘秀才在東所贈

查慎行

潘生昨朝贈我虹橋板云此購得從仙山慢亭宴罷精
斷此木度在萬仞之屏顏蒼鷹健鶻對對巢不得但見成
群接臂呌跳猿猴獬黃冠白足力難致間出廣者相欺謾

有時晦冥晝風雨神物欲降天爲怪前者偶經此巖下巖
前白浪吞船豚忽驚片板半空落有若胎禽墮毳輕飛翮
主人大笑童僕喜謂獲至寶非空還已令巧匠刻爲佩辟
易魑魅妖姦知君好奇特分贖徑尺未許酬千餞我時
聞斯語未敢相譏訕今晨入武夷好事搜險艱生爲指其
處乃在一曲二曲三曲灣初疑棧道上露出船尾彎又如
鳥鼠穴竹箭亂挿同榛菅神輸鬼運義奚取徑路斷絕誰
躋攀忽憶少年日南走五溪窮百蠻蠻人寄命巖洞裏多
構柴柵臨崢嶸今之所見正此類亦如桃源之客避亂來
其間不然鸞輪雲馭本飛渡豈有剡木留塵寰摩挲重是

千歲物肌理駁蝕生香斑携歸壓書儘有用何必新奇瓌
詭驚愚頑

架壑船

船長約二丈許中濶首尾漸狹類梭形傳爲圓木剝成且
具棹櫂然遙望之弗能詳也李磊英云舊志載武夷仙船
凡七在昇真洞者四堯鑿峯者一小戴峯者二然不止此
堯鑿或云二艇此外更有六艇一在金鷄洞二在鷄窠巖
一在眞武洞一在小戴峯北壁穴中東壁所見架壑船舊
有四明萬曆丁巳夏墜其一內貯磁器隨皆糜碎好事者
爭藏其板嗅之微香國朝康熙辛亥秋又墜其一今所存

者小藏凡三又按程應立所見金鷄洞內貯香一船及今
洞口所懸蓋亦二艇又傳白雲洞有一艇是其數通計爲
十六矣不知尙有未盡否

仙船

宋陳夢庚

此船何事架巖隈不逐浮槎八月來莫是飛仙無所用乘
風有路到蓬萊

仙船

明卓思茂

幔亭橋斷已多年最是曾孫舉世憐苦海無邊誰到岸虛
舟何事獨凌烟溪頭漁艇桃源隔天上星槎銀漢懸諒有
濟川風信便不愁弱水路三千

架壑船

孫朝護

依稀鶴首嵌崖隈云是仙人權得來風雨任摧金石固星
河宜泛混濛開牽將野岸元非屋寘向均堂應似盃何用
强人姑妄語箇中詭異竟誰猜

仙蛻

武夷仙蛻現可見者四大王峯之張垓徐熙春杜蕩巖之
程艮初水簾洞之王廣而已明萬曆時直指楊岡知見張
裸程近藝因而裝塑今骨全掩徐與王亦塑而口耳手際
稍見其骨齒皆宛然惟程艮初裸體無飾俯首趺坐俗稱
草鞋仙者是也

仙蛻

朱李仲光

晝夜本循環天地均此理人生出入機晝夜差可擬仙家
學蟬蛻脫然遺腐骨白骨尙珍藏似未忘生死

仙蛻

明李有則

弱水沉羽毛蓬萊隔塵路雖無長鯨波猶自濛烟霧仙人
非室居形成綠氣聚閉戶可採藥何必客顏遇凡心萬劫
迷神理千年悟日與仙人俱何益夢與寤武夷鍾靈竒蛻
骨堪指數古洞遺丹爐寒灰尙如故瞻望諒非遙步趨恐
遲暮願將玄秘理輔世還太素歸來煉丹砂憩坐瓊宮樹

遺骸

諸志云大王峯之昇真洞有五壩皆盛蛻骨又有四船相覆以盛仙函函共二十有餘空者數函又張仙巖一函白骨不全換骨巖九函仙釣臺眞武洞三函白雲巖右洞數函大藏峯石罅中十六函小藏峯有黃心木樛藏十三仙蛻骨紹聖端平間迎魏王顥骨至太乙宮祈雨不崇朝而沛降又云迎魏王顥稍弗虔輒飛去又云禱雨畢則仙蛻自返故處後爲孕婦所厭今雖靈不復飛上矣又萬曆間接笋峯道士程應立曾至金鷄洞中云內藏楠木甚多一長三丈徑尺餘上置仙蛻十三函每函或顥骨數片或脰骨一二莖手骨一二節皆裹以錦帕一函乃鶴骨椎頭及

一足又一舟楠木剝成長丈餘濶三尺許內盛香末如細羅洞中香灰纍纍成堆按諸峯雖有遺骨何所據而爲仙小藏金鷄皆有十三函又何所據而指小藏爲十三仙之骨子騫旣更衣上升安得復有頭顱傳世謝在杭云神仙暫遊萬里少別千年世間一切事棄如敝屣乃復愛護委蛻不合朽腐則見其解反不若蛇蟬之屬脫然無累矣余謂神仙不食人間煙火未必尙愛遺骸子騫顧骨初之飛不知果否而今之不飛則豈不飛也然文公權歌武夷山上有仙靈則仙骸又不容不脩錄也

遺蛻

元沙中子

武夷別是一區襄咫尺蓬萊手可攀一葉輕舟九曲水數聲啼鳥萬重山雲崖天近嵐長濕石洞春深蘚自斑莫道仙凡相去遠幾多蛻骨在巖間

仙棧

四曲仙棧巖西壁有木一橫兩豎形如卅字相傳謂仙棧釣竿

四曲金鷄洞口豎一竹竿儼然垂綸風吹不落雨濯不朽
枏木樓

八曲鼓樓洞內有枏木樓高廣三四尺許規制精巧見者驚猶鬼神傳是飛來陳幼溪曾至洞中記木樓云窓櫺甃

瓦無非木製釘頭露木外者半寸測爲千百年物李懷之
云萬曆庚申夏大風雨鼓樓洞中木樓飛出越三仰峯而
去土人目擊者甚衆落一礎如棋子大道士黎望雲者拾
得之珍藏傳玩甚久

雜錄

游三蓬秦時人少孤與翁乞奴漁一日泊梅溪渡口有老翁甚藍縷求渡叩其所徃曰皇太姥將宴群仙能從我遊乎蓬兄弟幸甚翁令瞑目坐舟中但覺蓬蓬如飛有頃聞鶴唳竊視之則舟已擱巖間矣遂與衆預幔亭之宴游自是絕粒或言今三曲架壑船卽其所棹也 見晉安逸志

浦城楊文公億將生時母章氏夢羽衣人自言武夷仙托化既誕則一鶴雛也舉室驚駭棄之江叔父曰吾聞間世之人其生必異乃追至江濱發視之已蛻爲嬰兒其

體猶有毛長尺許經月乃落

見建寧府志

崇安劉侍郎夔少隸業山中一夕方觀書忽有手藍色毛
毵毵然自窓隙入爲剔燈公遽執而署以押叱使去曰
不能去矣乞侍郎去所書公拭之乃去

見裴釋生
武夷志

宋天聖二年二月朔夜忽大風雷雨石堂寺巖崩地陷僧
果緣與鄉人詹立等罹伏壓死惟僧居仁行者子明子
雲獲免黎明鄉人至群見居仁坐於先師塔前李木下
如寐呼之始覺自言爾時若有人挾去不知何以在此
仁方嘆僧蹂毀失忽從水上漂來衆咸異之或曰先是
鼓樓巖有仙蛻又有一山羊常遊食院側詹立等煨蛻

爲苗藥又捕山羊食之人以爲致禍之由云

見徐德望
武夷志

浦城楊正臣天聖進士授南安尉稱疾去至武夷一日有

道人來謁投刺曰張湛然正臣館之南園是夜月明如

晝道人瀟洒長嘯忽雙鶴飛來跨之而去衆始悟爲十

三仙中張湛也視其刺乃白紙耳

見浦城志

治平間大旱有土人江小三者灌田均峯下遇三女授小

葫蘆盛水令灑之大雨如注越數日江往謝緣徑深入

有洞府榜曰雲虛之洞有金字朱牌題曰太素孔元君

太微莊元君太妙葉元君

見方外

仙童導引三女出見以

胡麻飯食之告之曰我本會稽上虞人唐天寶時來學

道得仙於此語畢指路送出來徑桃花波一小澗則三

姑石下至家已三載矣

見崇安志 按查孔莊葉即今
武夷換骨洞三皇元君是也

紹聖二年修建武夷宮殿落成八月辛巳安武夷君像於

新殿是日有白鶴三十二飛鳴而下翔舞於庭至暮望

昇真洞而去

見武夷
志錄

紹興初有黃樸者

見方
外

自樵川來武夷訪仙無所遇忽於

白雲巖下見草庵有道姑屏處色殊麗問樸來故因日

洞天無形仙豈可覓乎日將暮君且止此樸曰汝婦人

獨處於義不可姑日此地多虎恐君見傷樸不聽坐於

戶外夜半虎果至姑開門呼之卒不肯起堅坐達旦虎

潛去姑曰君眞有志者洞天去此不遠乃指以徑且曰
溪深不可渡過樵者當拜求之樵如其言樵者慍曰是
姬如許饒舌遂令樵閉目挽其衣倏忽過溪則見宮殿
崔嵬不可名狀一人碧玉冠絳袍雲履坐殿上命左右
引樵至前曰汝何人輒至此宜速回積功累行他時或
可再來乃食以胡麻飯遣之出至崖下回望高山深谷
窅非初境道姑與庵亦失所在

見崇安志

咸淳間蜀人彭澹軒罷江東倅遊武夷嘗獨行林藪入草
庵見兩人峨冠博帶容貌迥殊方對食招彭共坐俎中
豕首一羊脯一鷄一所言皆先天圖易性理之學彭心

敬之請姓字右坐者云姓魏野叟無字左坐者不荅至暮辭歸明日再往竟不得其處告諸人云昨祭朱子祠此正俎中之餽乃悟左者爲晦翁右者魏鶴山也見異錄

東陽人黃咸中見方外宿止止庵夜半過道人坐石上呼曰

汝名在仙籍乃授以秘書及方寸銅印曰佩之可濟世延年時有彩雲捧月因令咸中更各慶雲約七十年後再會問其姓名曰東南子遂變空而去見清江雜錄

楊萬大崇安人結茅武夷漁樵山水間一夕有道士扣門求宿後數往來一日謂萬大曰吾非世人今當歸洞天

觀汝所爲甚善盍偕我去萬大曰吾二親未塋豈可去
道士曰待爾喪事未晚遂共舟至甌寧豐樂里指一處
曰某年月日奉柩至此視白狸眠處即塋所伺其起即
塋時萬大及期往果如所言後萬大年九十七晝寢夢
前道士來迎曰汝今可以去矣覺即沐浴更衣端坐而
逝楊族甚蕃因名其地曰楊墩墓曰白狸窩明太師楊
文敏公榮萬大之後也

見甌寧志

張潞公翥嘗奉使經武夷所歷悉如舊遊心甚怪之繼至
一石室有道人坐化其中形體如生忽悟爲其前身慟

哭而返因自號蛻庵詩曰蛻庵集

見江仲魚武夷志

路公字仲舉元時襄陽人福建通志載急副張翥乃
濟寧人洪武間任益別一張翥非路公也

成化間有鄉民削竹籤插仙船巖壁攀緣而上見船中貯

銅盆一內金魚二尾游泳自若駭下告人不信憇之再

登令携囊取盆下羣聚觀巖麓見已擎盆置囊中矣忽

一鷹猛下自手攫囊冲雲而沒民驚墜幾斃

見高卧雜錄

嘉靖間有田父于武夷天柱峯下遇一樵者坐譚久之問

父曾見仙乎父曰未也所謂仙窟特虛語耳樵者笑出

袖中詩一紙與之其詩云曾買金陵酒一卮與君相共

話玄機壺天有路客人到凡骨無緣化鶴飛莫道烟霞

愁縹緲好將鄉國認依稀可憐寂寞空歸去休向紅塵

說是非以紙示人忽風過字迹皆滅父自是不食不服

浪迹雲水不知所終

見江志

棲陰新檢載福州安翁嘗遇仙贈以書所題卽此詩也

嘉靖間星村藍原居人將毒溪以取魚有老人鬚髮皓然詣首事之室曰九曲溪不可毒中有神物居之其人曰藥已具矣衆蜂集吾一人豈能阻老人悼嘆不已留饌辭以持齋乃以豆腐及莧菜進食已謝去衆放藥得大魚重百餘觔剖之見豆腐莧菜在焉衆驚悔不數日首事暴卒尋大疫死者甚衆

見寐嚙集

萬曆丁丑三月崇安民張富郎者自大藏峯頂設轆轤繩

險至金雞之上洞見滿洞香灰數人軒墜其內傍覆一
銅磬揭視之磬下一鷄奮起翼展灰飛不能仰視有頃
開目則人與鷄俱失所在倉皇而下風雨暴至漲時年
八十餘

見舊志

昔有平川人採舟過卧龍潭見漂板上積薦矢知是虹橋
板取而濯淨置諸舟中移數棹顧之已失矣仰瞻則在
金雞洞口水濕猶滴因驚異告人謂神物不可妄得如

此見姑留草

金雞洞有鐵香爐可三百觔傳爲嘉靖甲午歲飛來云又
戊戌夏李中溪江午坡諸公遊武夷舟過洞下見洞中

有一物丹朱爛灼狀如香奩大可六七尺許相顧駭愕

李公作記謂伊誰置之真不可解矣

見徐氏筆精

翁東崖以僉都請告歸遊武夷至五曲遇一人揮手曰別
久矣巖下授受秘語解公大阨乎今可回頭矣言已忽
不見公恍然起歸遂卒於舟中及柩抵家啟視之眉宇

欣欣如生云

見湧幢小品

邱止山解組歸棲武夷山閉閤講學與其友宿高明樓夜
有怪倚門作人語曰同遊不亦樂乎何卧之早也止山
應曰我載晨而遊抱日而歌汝胡不吾和而同其樂何
爲昏暮而來也怪應曰不能止山曰吾亦不能怪嘆息

而去

見明詩綜

附錄

公移

五曲書院祠田

巡按福建監察御史周爲修理先賢祠宇事照得本院按臨之初據崇安建陽二縣各掌印官及二學師生稟稱武夷五曲舊有先賢朱文公祠堂一所即今年久倒塌應合修理等情後該本院親臨彼處逐一看視知果是實切照大賢祠堂若使傾壞不修則無以崇尚先德風勵後學係屬人心但今地方多事百姓貧乏難以科派所計前祠合用木石磚瓦等料該用銀兩本院自行措處其該用人夫亦不必起點鄉夫止將現在民快量

用四五十名輪流仍給與食米庶不費民財不妨民力而功亦可就爲此除將畫成式樣一張粘發前來外仰抄案回府着落當該官吏照依案驗後開條件事理即便差委估計營辦應役興工施行正德十三年十月

日

正德十四年十一月十五日崇安縣蒙察院周祭放仰將范廷剛原入官田九十石四斗取具各人親供同抽四十石湊章經田六十石共一百石入武夷朱文公祠餘下五十石四斗均撥與胡文定公蔡九峯二書院各得二十五石二斗汝該縣自區處施行本縣遵照原蒙

定撥田土備查各佃耕作田畝畫圖貼說并先賢子孫
照管田苗數目備由粘繳開坐申乞施行計開武夷書
院戶民田一百畝糧米四石該苗米一百石附本縣在
城九畝十甲里長下一應差役悉皆優免

物產

藝屬

茶 茶之產不一崇建延泉隨地皆產惟武夷爲最他產性寒此獨性溫也其品分巖茶洲茶附山爲巖沿溪爲洲巖爲上品洲次之又分山北山南山北尤佳山南又次之巖山之外名爲外山清濁不同矣採摘以清明後穀雨前爲頭春立夏後爲二春夏至後爲三春頭春香澁味厚二春無香味薄三春頗香而味薄種處宜日宜風而畏多風日多則茶不嫩採時宜晴不宜雨雨則香味減各巖著名者白雲天遊接笋金谷洞玉華東華等

處採摘烘焙須得其宜然後香味兩絕第巖茶反不其
細有小種花香清香工夫松蘿諸名烹之有天然真味
其色不紅崇境東南山谷平原無不有之惟崇南曹墩
乃武夷一脈所產甲子東南至于蓮子心白毫紫毫雀
舌皆外山洲茶初出嫩芽爲之雖以細爲佳而味寔淺
薄若夫宋樹尤爲希有又有名三味茶別是一種能解
醒消脹巖山外山各皆有之然亦不多也

謝尙書惠蠟面茶

唐徐夔

武陵春暖月初圓採摘新芽獻地仙飛鵲印成香蠟片啼
猿溪走木蘭船金槽和碾沉香末冰椀輕涵翠縷烟分贈

思深知最異晚鐘宜煮北山泉

和章岷從事鬪茶歌

宋 范仲淹

年年春自東南來建溪先暖水微開溪邊奇茗冠天下武夷仙人從古栽新雷昨夜發何處家家嬉笑穿雲去露芽錯落一番榮綴玉含珠散嘉樹終朝采掇未盈襜惟求精粹不敢貪研膏焙乳有雅製方中圭今園中蟾蜍苑將期獻天子林下雄豪先鬪美鼎磨雲外首山銅甌携江上中冷水黃金碾畔綠塵飛紫玉甌心雪濤起鬪茶味兮輕醅醑鬪茶香兮薄蘭芷其間品第胡能欺十目視而十手指勝若登仙不可攀輪同降將無窮耻吁嗟天產石上英論

功不愧階前真衆人之濁我可清千日之醉我可醒
屈原試與招魂魄劉伶却得聞雷霆盧同敢不歌陸羽須作經
森然萬象中焉知無茶星商山丈人休茹芝首陽先生休
采薇長安酒價減千萬成都藥市無光輝不如仙山一啜
好冷然便欲乘風飛君莫羨花間女郎只鬪草贏得珠璣
滿斗歸

咏茶

蘇軾

君不見武夷溪邊粟粒芽前丁後蔡相繼加爭新買龍各
出意今年鬪品克官茶吾君所乏豈此物致養口體何相
耶洛陽相君忠孝家可憐亦進姚黃花

咏頭春貢茶

元劉說道

靈芽得春先龍焙收奇芬進入蓬來宮翠旣生白雲坡詩
咏粟粒猶記小時聞

咏武夷茶

杜本

春從天上來噓拂通寰海納納此中藏萬斛珠蓓蕾

咏貢茶

林錫翁

百草逢春未敢花御茶蓓蕾拾瓊芽武夷真是神仙境已
產靈芝又產茶

見貢頭春漫成

明蘇伯厚

采采金芽帶露新焙芳封裹貢楓宸山靈解識君王重土

正身山志 卷之八 詩
蘇軾
脉先回第一春

酬藍茶仙見寄先春

丘雲霄

靈雨開仙圃春風長玉芽摘來旗葉捲封處墨題斜品落
龍團翠香翻蟬眼花欲移三徑地從此遍栽茶

藍素軒遺茶謝之

御茶園裏春常早辟穀年來喜獨嘗筆陣戰酣青疊甲壁
壇雄助袂沉槍波驚魚眼聽濤細烟暖鷗鷺坐月長欲訪
躡歌雲外客注烹仙掌露華香

湛翁送茶

翡翠春巢瑤圃枝欣看雀舌展新旗甕中存有經年雪入

陽休傳到黨姬

寄容菴弟索茶

仙種先春仙已去採春長夢望仙亭
老來仍抱通靈癖雪水空留滿瓦餅

閩茶曲

明周亮工

御茶園裏築高臺鶯鵲鳴金禮數該
那識好風生兩腋都從著力喊山來

一曲休教松栝長懸崖側嶺展旗槍
茗柯妙理今爲祟十道人坐大荒

謝送武夷茶

國朝彭定求

芒屨何緣到武夷揀芽相餉等瓊枝却宜鴻漸烹泉日絕
勝龍團作餅時石鼎香浮涵素液水壺色映淨炎曦使君
風味情如許續取歐梅唱和詩

謝王適菴惠武夷茶

沈涵

雀舌龍團總絕群驛書相餉意偏殷香含玉女峯頭露潤
帶珠簾洞口雲不用破愁三萬酒慙無拄腹五千文呼童
携取源泉水細展旗槍滿座芬

武夷茶

陸廷燦

桑苧家傳舊有經彈琴喜傍武夷君輕濤松下烹溪月含
露梅邊煮嶺雲醒睡功資宵判牒清神雅助晝論文春雷

催苗仙巖笋雀舌龍團取次分

武夷茶賦

饒澤殷

夷山競勝曲水矜誇萬壑流清滋榮瑞草千峯萃秀產苗
香茶名推玉乳品羨金沙開山闢地今遍栽嘉種軒荆芟
穢兮好護玉華老幹長新枝盤根常看爛熳白花方吐蕊
香芬更羨清葩百草尙未芳叢先春陳雷驚筍羣林猶未
舒翠及時穀雨抽芽手亂人忙終朝不盈一掬前呼後隊
遍地何啻千家發葉當春暖盈筐盡日斜操管携籃攀援
隄畔蓬頭跣足踏遍林柯採摘帶嚴霜膚寒指冷爰求沾
苦雨荷笠披簑雨暗晴嵐均深永嘆風清日朗遍聽高歌

金井坑泉徹夜涼芳叢倍添氣味玉女峯頭迎曉霧新英
更羨猗猗秋露蘭花和雨滴杓香鷹嘴帶甜過虎嘯巖前
酪奴應爲驚出龍吟洞口雀舌更自喧和雲窩繞洞兮薰
蒸釀氣接筍懸梯兮攀摘煩疇金鷄洞唱五更寒家家燈
火連深夜卧龍潭靜三更月戶戶人聲徹僻窩焙芳不須
活火炒葉只用溫鍋清香味取醇厚白毫品羨麼麼炒青
研玉液醞綠泡松蘿碾細香塵起烹新味噴可數番活水
沸蝦鬚曾到一嘗猴下閭半勺甘泉浮螭眼何須三峽水
中科龍團鳳髓香殊異雪葉雲英味太和兩腋生風欣添
逸興幾杯消暑快任吟哦縱有世情珍百味那知茶品快

人多

篁屬

毛竹 生一曲毛竹洞每節旁生枝枝之巨細與幹等異種也

方竹 遍山皆有之幹正方八月生笋味甚甘

雙幹竹 生七曲城高巖寺後出土尺許分兩枝並上亦名同根竹今無

同根竹

元謝宗可金陵人

競秀亭亭一種奇駢頭曾脫錦棚兒西山二子情依舊湘浦雙娥影自隨高節元非連理樹虛心共是傲霜枝莫教

移作仙人杖恐化雌雄下葛陂

筇竹 一名鶴膝竹又名淨瓶竹節大而莖細最宜杖生

山北章堂巖一帶

湛翁携鶴膝竹杖贈別藍原之上

明丘雲霄

鶴膝逢仙授龍筇得舊傳葛陂憐往事藍澗紀何年登眺
交盟重煙霞引興偏從來神物異不敢渡延川

果屬

小李 生大王峯頂形如小鳥卵稍長而色赤味甚美

山荔枝 亦生大王峯密實叢生味頗類晉安者但差小

耳

仙橘 小者如彈丸皮可食大者如鷄卵味甚甘美亦生
大王峯頂花實不與恒橘同時故以仙稱

酬劉白雲五月登大王峯絕頂得仙橘數十顆見遺

歌其事異之

明丘雲霄

孤峯萬丈摩青空懸猿飛鳥愁力窮丹崖翠壁擁蓬島白
雲紫霧相幙幙花開花落非人世巖頭五月垂橘紅世人
俗眼不得見況能顆落歸懷中朱囊碧蒂醉香露瓊肌玉
液搖春風洞庭霜後不足數蓬萊殿上空筠籠偷桃曾傳
漢方朔歲星左謫爲臣工攀登直是有仙骨却憐野老非
方瞳我今既已食仙實刀圭入口能成功竹冠蘭佩衣薜

荔鞭雲策電騎長虹與君再到此山頂弄攜日月如磨礪
爲問子騫去何許星臺烟鼎寒青蔥覺來天地同生死空
憐散髮探鴻濛君不見幔亭歌罷虹橋斷曾孫幾世成老
翁

蔬屬

葇菜 辛菜也冬月布地叢生二月開細黃花結細角內
有子味甚辛辣洪舜俞老圃賦云葇有拂士之風林洪
山家清供云朱文公飲後輒以葇莖供蔬品也

葇次公濟惠山蔬

四首之一

朱熹

靈草生何許風泉古澗旁褰裳勤采擷枝筯噫芳香冷入

玄根閔春歸翠頰長遙知拈起處全體露真常

蕓菜次劉秀野蔬食十三韻之一

小草有真性託根寒澗幽懦夫曾一噉感憤不能休

藥屬

石菖蒲 一名昌陽又名昌歆其種有二大而生水次濕地者其根盤屈有節狀如馬鞭不堪服食小而生石磧者葉如劒脊一寸九節乃本草所謂久服輕身益智不老者也山中間一有之不可多得劉學箕贊曰茸其髮劒其脊露葉凝泉雲根絡石英英塵俗之表濯濯丰神之特稜稜林壑之秀戢戢澗溪之質茲蓋飽九秋之煙

霏擅千巖之叢碧者也

謝劉彥集菖蒲之貺二首

宋朱熹

君家蘭杜久萋萋
近養菖蒲綠未齊
乞與幽人伴岑寂
小窗風露日低迷

泉清石瘦碧纖長
秋露懸珠炯夜光
箇裏無窮閒造化
別來誰與共平章

茯苓 老松根底往往有之以成形者爲佳

致明贈茯苓如嬰孩狀以詩爲報 劉子翬

老松寒不死密壤聚流脂
小剝凌蒼翠深藏發怪奇
應憐雙鬢老爲寄玉嬰兒
屑餌消殘疾同尋汗漫期

寓屬

王孫似猴而小大僅如拳朱文公山中詩王孫遠相與
韓元吉武夷精舍記山故多王孫是也

禽屬

白鷗狀類雉大倍之白毛黑緣爪喙皆丹韓元吉武夷
精舍記云鳥則白鷗鷗鵠聞人聲或磔磔集崖上散漫
飛走而無驚懼之態

白鷗詩

明徐渭

閩南煙雨迷青嶂孤雌挾子飛天上却憶羈雄不得歸兩
漿深籠鏡波漾片雪長梢向尾分有時夢見武夷君山長

寓居禽鳥比屬草屬

水遠無書寄不及南飛鴻鴈羣
主人爲爾苦惆悵開籠欲
放非難放矰繳鷹鷂何處無
萬里憑誰報無恙

鷓鴣 形似牝雞臆前有白圓點背毛有紫赤浪文鳴云
鈎輈格磔俗謂爲行不得也哥哥

花屬

風蘭 根不着土叢蟠木石間取懸簷際受風則茂羣芳
譜云隨風飄揚冬夏長青可稱仙草

草屬

巖松 一名萬年松草之似松者高三四寸生崖壁間採
之可作盆供久藏枯瘁得水卽青翠復活

武夷山產二首

明方以智

采藥閒相訊提籃各一莖巖肝因雨長石斛挂風生山樓
凝成紙櫻魚椒作羹獨餘溪上蕓居者未知名

巖肝石菌也山樓小樹有涎抄紙櫻
魚櫻笋也蕓菜辣朱子所食有詩

城高雙幹少鶴膝出章堂方笋供秋興枏皮結異香老君
筋益氣千里菊堪囊鐵線凌冬發幽蘭意味長

城高雙幹竹今無矣鶴膝一名淨瓶方竹以
秋出笋老君筋藥名千里菊即萬年松也

武夷山志卷之十九終